



Minggu, 17 Desember 2023

Ogen : Miha 2:1-5



Cilaka Si Ngukurken Kejahaten



Nabi Miha ngerana man bangsa si nindas kalak Juda. Takapna ia megegeh ras erkuasa, e maka ilakokenna bagi ate-atena si erbahan bangsa Juda rate mesui. Rate-ate ia kerina i bas perukuren ras lagu langka. La ia mehamat man Tuhan si enggo milih bangsa Juda jadi bangsaNa. Sura-surana saja ipebelinna. Lit singukurken kejahatan nandangi temanna. Irancangna si jahat tupung ia tayang i bas ingan medem. Kenca pultak matawari, keke ia lako ndalanken kai si irencanakenna ndube. Tuhu, la lit si bujur si iukurina. Mengga atena juma kalak irampasna, mengga atena rumah kalak ibuatna, la lit ibahanna aman jabu ras erta kalak. Ia akapna si hebatna, tempa lit kuasana nandangi erta ras keluarga kalak si enterem. Perbahanen kalak e situhuna ngerehken rawa Tuhan. Sitik pe la idalankenna pedahNa e me ngelakoken kebujuren ras keadilan. Dibata e adil, iperdiatekenNa kerina kecibal bangsaNa. Tupung lit bangsa sideban ngelakoken kejahatan nandangi bangsana jine, la terbahanna sinik. Nina Tuhan, "Aku ersura-sura maba cilaka man bandu." Amin pe bangsa Juda pernah encedai pusuh Tuhan, tapi tupung bangsa e igasgasi kalak, labo ka meriah ukurNa. Bangsa siapa pe, adi labo ngelakoken kebujuren, iradasken Tuhan. Labo terbuali Tuhan e sabap ietehna kai si iukuri kerina bangsa. Lenga lakokenna si jahat, tapi bas ukurna enggo lit sura-sura si jahat, e pe iangka Tuhan. Janah Tuhan labo sinik nandangi kalak si bage. Iukum ras iradaskeNa. Pengakun kalak Juda, enggo keru kal kami radas, taneh kami enggo ibagi-bagikan Dibata man bangsa si nidih kami. Lanai lit si man pekena-kenan kami. Adi taneh ibereken man bangsa sideban seri kap e ibuat kegeluhen i bas bangsa Juda nari. Arah taneh nge ia nuan-nuah, i bas taneh nari turahen dukut-dukut man gagaten rubia. Di kune taneh e ibereken Tuhan man musuh/bangsa si deban, bene me kegeluhen bangsa e. Bage me pertangis bangsa Tuhan si sangana ngenanami kiniseran .